

Prinsip Penentuan Hukum Terhadap Pembahagian Daging Korban Kepada *Non-Muslim* Menurut Mazhab Syafie

(The Legal Principles Of The Distribution Of Meat (Qurbani) To Non-Muslim From Syafie's Thought)

¹Mohd Lukman Bin Daud, ¹Mohd Izhar Ariff Bin Mohd Kashim

^aFakulti Pengajian Islam, Universiti Kebangsaan Malaysia

*Corresponding author: mankks@yahoo.com

Article history

Received: 2017-02-02

Received in revised form: 2017-03-17

Accepted: 2017-03-21

Abstrak

Artikel ini membincangkan berkenaan prinsip penentuan hukum terhadap pembahagian daging korban kepada *non-muslim* menurut Mazhab Syafie. Terdapat perbezaan pandangan dalam kalangan Ulama' Syafie dalam isu ini. Sebahagian Ulama Syafiiyah berpendapat tidak boleh memberi daging korban kepada orang kafir dan sebahagian pandangan menyatakan harus memberi daging korban kepada *non-muslim*. Objektif kajian ini adalah untuk mengkaji pandangan fuqaha' Mazhab Syafie mengenai hukum pengagihan daging korban kepada *non-muslim* serta menganalisa pandangan^c ulama dan dalil terpilih berkaitan hukum pembahagian daging korban kepada *non-muslim*. Bagi melengkapkan kajian ini, kaedah pengumpulan data telah dijalankan menggunakan rekabentuk kualitatif dengan menggunakan metode analisa dokumen dan juga metode temubual separa struktur. Dapatan kajian menunjukkan bahawa pandangan dalam Mazhab Syafie yang mengatakan harus memberi daging korban kepada *non-muslim* adalah lebih sesuai dan boleh diterima pakai dalam konteks masyarakat majmuk dan silang agama di Malaysia. Keharusan ini dilihat dari sudut masalah dan juga dari sudut maqasid dakwah kepada golongan tersebut.

Kata Kunci: Penentuan Hukum, Pembahagian Daging Korban, *Non-muslim*, Mazhab Syafie.

Abstract

This article discusses the principles of law applicable to the distribution of meat (Qurbani) to *non-muslims* by Syafie school of thought. There are differences of opinion among scholars Syafie in this issue. Some scholars argue Syafiiyah can not give the meat (Qurbani) to the *non-muslim* and the views expressed should give some meat to *non-muslims*. The objective of this study was to examine the views of jurists regarding the Shafi'i school of law of distribution of meat (Qurbani) to *non-muslims* as well as scholars analyze^c views and arguments relating to the legal distribution of selected meat to *non-muslims*. To complement this study, the method of data collection was conducted using qualitative design using document analysis and semi-structured interview method also. The results showed that the views in the said Syafie school of thought should give meat (Qurbani) to *non-muslims* is more appropriate and acceptable in the context of cross-religious and pluralistic society in Malaysia. This must be viewed from the angle masalah and also from the point of Maqasid propaganda for them.

Keywords: Legal Determination, Distribution of Qurbani Meat, *Non-muslim*, Syafie School of Thought

1.0 PENGENALAN

Perbezaan pandangan dalam kalangan fuqaha' terutama dalam masalah yang bersifat furū'iyah merupakan suatu yang biasa dan lumrah di dalam perbincangan ilmu fiqh. Malahan ia merupakan sesuatu yang tidak dapat dielakkan dan dianggap sebagai keperluan. Perbezaan ini meyebabkan agama Islam itu bersifat dinamis dan fleksibel seiring dengan peredaran masa dan zaman. Tidak semestinya pandangan setiap mujtahid itu betul, sesuai dengan masa dan keadaan. Ada masa ia betul dan ada masa ia silap dan boleh jadi ia bersesuaian dengan masa dan keadaan (Muhammad Abū Zuhrah, t.th).

Masyarakat perlu bersikap terbuka dan menerima pandangan setiap mujtahid tanpa ada rasa taksub kepada mana-mana tokoh atau taksub kepada mana-mana aliran atau mazhab dalam pelaksanaan dan penghayatan terhadap fiqh Islam. Dalam keadaan-keadaan tertentu ia boleh beralih atau menerima pakai hasil ijtihad mujtahid dari aliran mazhab yang lain sekiranya hasil ijtihad oleh imam mazhabnya tidak bersesuaian dengan keadaan dan peredaran zaman yang semakin rumit (Ali Jumaah, 2004).

Sikap tasamuh dalam kalangan mujtahid dan juga masyarakat Islam menyebabkan fiqh Islam itu akan sentiasa berkembang sesuai dengan peredaran masa dan yang penting ia akan menonjolkan kelestarian keindahan ajaran Islam pada golongan *non-muslim*. Dalam masa yang sama ia juga dapat menjadikan fiqh Islam sebagai warisan dasar dalam kehidupan manusia dan sebagai arus perdana sesuai dan relevan dengan kemajuan semasa (Atikullah Abdullah, 2010).

Berhubung dengan masalah yang berkaitan pembahagian daging korban kepada *non-muslim* terdapat beberapa pandangan dari Syafi'iyah tentang perkara tersebut. Ia sering menjadi pertikaian dan perselisihan terutama dalam masyarakat berbilang atau silang agama. Penetapan hukum yang bersifat mesra hubungan antara masyarakat berbilang kaum dan agama perlu diketengahkan bagi mengelakkan golongan *non-muslim* terguris dengan ajaran Islam dalam masa yang sama tidak menggadaikan prinsip dan dasar Islam. Menurut pandangan sebahagian Syafi'iyah dan juga pandangan Imam al-Syafie, daging korban tidak boleh diberi makan kepada golongan *non-muslim* (al-Syarbini, 1997). Mereka mengqiyaskan ibadah korban sama seperti amalan zakat di mana hanya orang Islam yang berhak menerimanya. Dalam masa yang sama mereka berpandangan bahawa pemberian dan pengagihan daging korban sesama muslim adalah bertujuan untuk mengeratkan sesama Islam.

Pandangan ini di peringkat awal dan sebelum berlakunya interaksi yang rapat antara kaum khususnya di Malaysia tidak menimbulkan apa-apa masalah. Tetapi sejak kebelakangan ini apabila berlakunya interaksi dan perhubungan yang erat antara kaum terutama di kawasan kejiranan dalam sesebuah taman atau perhubungan yang rapat antara rakan sekerja yang berlainan agama, maka ia menjadi amat janggal sekiranya tidak menjemput mereka pada majlis yang diadakan. Ini menyebabkan mereka rasa terpinggir dan perhubungan masyarakat silang budaya dan agama menjadi renggang. Cuma mutakhir ini, dalam kalangan Syafi'iyah berpandangan bahawa harus memberi dan membahagi daging korban kepada golongan *non-muslim* tetapi masih terikat dengan beberapa perkara. Penilaian dan penentuan hukum yang kontemporari dan bersifat semasa, sesuai dengan peredaran masa dan keadaan perlu diketengahkan bagi mengatasi kemelut dan pertikaian terutama dalam kalangan masyarakat umum perlu di ketengahkan bagi menyelesaikan perkara tersebut.

2.0 PANDANGAN FUQAHA MAZHAB SYAFIE YANG MENGHARUSKAN PEMBERIAN DAGING KORBAN KEPADA NON-MUSLIM.

Mengenai hukum pemberian daging korban kepada *non-muslim*, jelas bahawa ia merupakan perkara khilaf dalam kalangan ulama' mazhab. Menurut Mazhab Maliki, memberi makan daging korban kepada *non-muslim* hukumnya adalah makruh, manakala Mazhab Hambali menyatakan bahawa harus memberi hadiah daging korban kepada mereka dan keharusan ini hanyalah untuk korban sunat sahaja. Perbezaan pandangan dalam kalangan ulama' mazhab ini hanyalah pada korban sunat semata-mata dan bukan pada korban wajib. Ini kerana ulama' mazhab bersepakat bahawa haram hukumnya memberi daging korban wajib kepada *non-muslim*. Namun di dalam Mazhab Syafie, bagi korban sunat terdapat dua pandangan. Pandangan Imam Syafie sendiri menyatakan haram hukumnya memberi daging korban kepada *non-muslim*, manakala pandangan al-Nawawi ia mengharuskan pemberian daging tersebut kepada bukan Islam. Hukum keharusan tersebut tertakluk kepada perkara-perkara berikut:

2.1 Hanya Kepada Korban Sunat Sahaja

Ibadat korban merupakan ibadat yang amat digalakkan dalam Islam dan sekiranya dilakukan dengan hati yang ikhlas akan mendapat ganjaran yang besar di sisi Allah SWT. Ia terbahagi kepada dua jenis, iaitu korban sunat dan korban wajib. Korban sunat ialah menyembelih haiwan tertentu dengan niat taqarrub kepada Allah dan dilakukan pada hari raya aidiladha dan juga pada hari tasyrik. Manakala korban wajib merupakan korban nazar yang mana sekiranya seseorang itu bernazar untuk menyembelih korban, maka wajib baginya berkorban bagi menunaikan nazar tersebut. Berhubung dengan pembahagian daging korban kepada *non-muslim* terdapat pandangan ulama yang menyatakan bahawa keharusan tersebut hanya untuk korban sunat sahaja dan tidak termasuk korban wajib.

Menurut al-Buhūti (t.th) di dalam kitabnya *Kasyfu al-Qina' An Matan al-Iqna'*, harus memberi daging korban bagi orang kafir sekiranya korban itu adalah korban sunat. Berkata Imam Ahmad, kami berpandangan dengan hadis Abdullah (Dimakan daging korban satu pertiga, diberi satu pertiga kepada sesiapa yang dikehendaki dan disedekahkan kepada fakir miskin dengan satu pertiga bahagian lagi). Alqamah berkata (‘Abdullah Bin Mas'ud R.A mengutusku dengan seekor haiwan sembelihan jemaah haji (*hadyun*). Maka beliau memerintahkan kepadaku untuk memakan sepertiganya, menghadihkan sepertiganya kepada keluarga ‘Utbah Bin Mas'ud dan menyedekahkan sepertiga sisanya. Sekiranya sedekah (korban) itu wajib, maka beliau tidak akan memberinya kepada orang kafir daripada sedekah (korban) tersebut seperti zakat dan kafarah.

Pandangan ini disokong oleh Al-Nawawi (t.t) di dalam kitab yang berjudul *al-Majmuk Syarh al-Mubazzab li al-Syairazi* turut membincangkan tentang perkara tersebut. Beliau berpandangan bahawa keharusan pemberian daging korban kepada *non-muslim* hanyalah terhadap korban sunat, tidak termasuk korban wajib.

Menurut Muhammad al-Zuhaili (2011) di dalam kitabnya yang berjudul *al-Muktamad Fi al-Fiqhi al-Syafie*, sepakat ulama' berpendapat bahawa harus memberi makan dari kalangan *non-muslim* dari sembelihan korban sunat dan bukan pada korban wajib seperti nazar dan sebagainya.

Menurut Wan Salim Bin Wan Mohd Noor, Mufti Pulau Pinang (2017), beliau menyatakan bahawa dalam masalah *kehilafiyah* atau perkara *ijtihadīyah* umat Islam perlu berpegang dengan pandangan yang bersesuaian dengan realiti masyarakat setempat dan boleh memilih mana-mana

pandangan-pandangan tersebut. Tegasnya lagi, dalam mengaplikasikan ayat al-Quran sendiri pun, sekiranya tidak mencapai masalah atau kebaikan kepada manusia sudah tentu ada kesilapan dalam menafsirkan ayat tersebut atau ada kesalahan semasa kita mengaplikasikan pandangan tersebut. Fatwa sesebuah negara tidak boleh mengikat negara yang lain. Begitu juga dalam mazhab, pandangan penghurai mazhab tidak semestinya sama dengan pandangan pelopor mazhab sebagai contoh dalam soal pembahagian daging korban kepada bukan Islam, tidak semestinya pandangan Imam al-Syafie yang mengatakan haram itu tidak akan berubah selamanya. Beliau menyatakan daging korban tersebut boleh diberikan kepada *non-muslim* dengan syarat ia adalah korban sunat dan bukan dari korban nazar dan seumpamanya yang wajib.

Pandangan yang sama juga turut diakui oleh Zulkifli al-Bakri (2016) yang mengharuskan pembahagian daging korban kepada *non-muslim* sekiranya mereka itu dikenali dengan baik dan ramahnya dengan masyarakat setempat. Perkara ini perlu dilihat dari sudut masalah dan *siyasah syar'iyyah* dalam masa yang sama juga perlu melihat kepada masyarakat Islam setempat yang lebih memerlukan dengan mengutamakan mereka terlebih dahulu.

Mesyuarat Jawatankuasa Fatwa Negeri Melaka Bil.6 Tahun 2006 menyebut tentang keharusan mengagih dan memberi makan daging korban kepada golongan kafir. Keharusan ini hanyalah dikhususkan kepada korban sunat tidak pada korban wajib sebagaimana pandangan al-Nawawi di dalam kitab *al-Majmuk*.

2.2 Hanya Kepada Kafir Zimmi Sahaja

Pandangan para fuqaha yang mengharuskan pembahagian daging korban kepada golongan *non-muslim* adalah bagi golongan kafir *zimmi* sahaja dan tidak termasuk kafir *harbi*. Islam mengajar umatnya agar tidak melakukan kezaliman terhadap setiap makhluk walaupun kepada golongan kafir. Ini sebagaimana yang dinyatakan di dalam al-Quran, firman Allah SWT:

Allah tidak melarang kamu daripada berbuat baik dan berlaku adil kepada orang-orang yang tidak memerangi kamu kerana agama (kamu) dan tidak mengeluarkan kamu dari kampung halaman kamu. Sesungguhnya Allah mengasihi orang-orang yang berlaku adil. Sesungguhnya Allah hanyalah melarang kamu daripada menjadikan teman rapat orang-orang yang memerangi kamu kerana agama (kamu) dan mengeluarkan kamu dari kampung halaman kamu, serta membantu (orang lain) untuk mengusir kamu dan (ingatlah), sesiapa yang menjadikan mereka teman rapat, maka mereka itulah orang-orang yang zalim (al-Quran, al-Mumtahanah 60:8-9).

Ibnu Qudamah (t.t) di dalam kitabnya *al-Mughni al-Syarh al-Kabir*, bahawa harus hukumnya memberi makan kepada orang kafir daging dari sembelihan korban. Beliau juga turut menjelaskan bahawa memberi apa-apa makanan (daging korban) kepada golongan kafir *zimmi* adalah harus kerana ia adalah sedekah sunat. Keharusan ini adalah disebabkan oleh kerana golongan tersebut tunduk dan patuh pada pemerintah Islam.

Pendapat ini turut dipersetujui oleh Syeikh Ibn 'Uthaimin (2016) bekas Mufti Arab Saudi yang menyatakan bahawa "Dibolehkan untuk memberi kepada orang kafir daging korban atas nama sedekah selagi mana mereka tidak memerangi dan membunuh orang Islam. Sekiranya mereka berbuat demikian, maka tidak wajib memberi daging korban. Pandangan yang dikemukakan oleh Syeikh Ibn 'Uthaimin ini mencakupi kafir *zimmi*, kafir *mustakmin* dan juga kafir *muf'ahid* dan tidak termasuk golongan kafir *harbi* yang wajib diperangi.

Hujah tersebut disokong oleh Ben Baz (2016) yang menyatakan pandangan sama apabila diajukan soalan mengenai keharusan memberi daging korban kepada *non-muslim*. Beliau

menyatakan bahawa tidak mengapa untuk memberi daging korban kepada golongan *non-muslim* yang tidak memerangi Islam seperti kafir *mustakmin* atau kafir *Mu'abid*.

2.3 Hanya Kepada Golongan *Non-muslim* Yang Fakir Miskin Sahaja

Allah SWT sentiasa memerintah umat Islam supaya sentiasa terdorong untuk melakukan kebaikan tanpa mengira keturunan, agama, darjat dan pangkat. Mereka diseru untuk melakukan kebaikan, berkasih sayang, prihatin terhadap golongan yang kurang bernasib baik serta sentiasa mengambil berat tentang hal keadaan mereka. Ini bertepatan dengan firman Allah SWT:

Dan (ingatlah), ketika Kami mengambil janji dari Bani Israel (iaitu): Janganlah kamu menyembah selain Allah, dan berbuat baiklah kepada ibu bapa, kaum kerabat, anak-anak yatim, dan orang-orang miskin, serta ucapkanlah kata-kata yang baik kepada manusia (al-Quran, al-Baqarah 2:83).

Dalam soal melaksanakan ibadat juga mereka diseru untuk ingat kepada golongan fakir miskin bukan sahaja dari kalangan orang Islam sahaja tetapi juga kepada golongan *non-muslim*. Dalam soal ibadat korban, pengagihan dan pembahagian daging korban bukan sahaja berlegar kepada orang Islam malah mereka digalakkan untuk memberi daging tersebut kepada golongan *non-muslim* khususnya dari kalangan fakir miskin. Beberapa pandangan ulama' berhubung dengan pemberian daging korban kepada *non-muslim* dari kalangan fakir miskin.

Antaranya seperti mana yang dikemukakan oleh Muhammad Zuhaili (2011) di dalam kitabnya yang berjudul *al-Muktamad Fi al-Fiqhi al-Syafie*, sepakat ulama' berpendapat bahawa harus memberi makan kepada fakir miskin dalam kalangan orang Islam dari daging korban. Manakala bagi fakir miskin *non-muslim* juga diharuskan memberi daging korban (korban sunat) kepada mereka. Beliau berpandangan bahawa skop kebaikan bukan hanya bagi masyarakat Islam semata-mata, malah ia mencakupi kepada seluruh masyarakat dan juga makhluk.

Manakala menurut 'Abdullah al-Faqih (t.t) memberi komentar berkenaan pemberian daging korban kepada bukan Islam khususnya bagi golongan yang tidak berkemampuan dan fakir miskin. Beliau juga turut merujuk kepada hadis Asma' binti 'Abū Bakar yang dia bertanya tentang ibunya yang kafir "Ibuku datang kepadaku dan dia adalah seorang musyrik pada masa Rasulullah SAW. Lantas aku meminta fatwa dari Rasulullah. Bolehkah aku menyambung silaturahmi dengan ibuku? Nabi menjawab: "Ya, boleh. Sambunglah silaturahmi dengan ibumu". Manakala hadis yang diriwayatkan oleh Abu Hurairah ra (Perbuatan baik terhadap setiap makhluk hidup ada pahalanya (Bukhari 2363).

Menurut Shawky 'Allam (2011) tidak mengapa memberi daging korban kepada *non-muslim* dengan sebab kemiskinan. Pemberian daging korban kepada golongan *non-muslim* dari kalangan fakir miskin dan yang tidak berkemampuan adalah bertujuan untuk melunakkan hati mereka dan mendekatkan mereka kepada Islam.

Soleh al-Munjid (2012) menyatakan bahawa di dalam Fatawa al-Lajnah al-Daimah ada menyebut "Harus bagi orang Islam memberi makan daging korban kepada golongan kafir *mu'abid* dan juga tawanan serta kepada mereka yang miskin atau yang mempunyai pertalian serta yang mempunyai hak kejiranan atau untuk melembutkan hati mereka...". Ini berdasarkan kepada keumuman ayat al-Quran dari firman Allah SWT di dalam surah al-Mumtahanah ayat 8-9 dan juga hadis Asma' Binti 'Abū Bakar.

2.4 Mengutamakan Orang Islam Terlebih Dahulu

Dalam soal melakukan kebaikan, umat Islam diseru untuk mengutamakan saudara sesama Islam terlebih dahulu berbanding golongan *non-muslim* ia merangkumi dalam soal pemilihan wali, pemimpin, penolong dan sahabat dengan mengeneipkan saudaranya yang beriman. Sebagaimana firman Allah SWT:

Janganlah orang-orang yang beriman mengambil orang-orang kafir menjadi teman rapat dengan meninggalkan orang-orang yang beriman (al-Quran, Ali Imran 3:28).

Begitu juga dalam hal pembahagian daging korban yang dituntut dalam Mazhab Syafie dan juga mazhab-mazhab yang lain. Dalam Mazhab Syafie terdapat beberapa pandangan mengenai pembahagian daging korban. Menurut qaul qadim dalam Mazhab Syafie, daging korban hendaklah dibahagikan kepada dua bahagian, iaitu satu bahagian untuk dimakan oleh pihak yang berkorban serta ahli keluarganya dan sebahagian yang lain untuk disedekahkan kepada fakir miskin. Manakala menurut *qaul jadid* dari Mazhab Syafie, daging korban tersebut hendaklah dibahagikan kepada tiga bahagian. Satu bahagian untuk pihak yang berkorban serta ahli keluarganya, sebahagian lain untuk fakir miskin dan sebahagian lagi untuk jiran dan sahabat handai termasuk juga orang yang kaya. Yang paling afdal adalah dengan menyedekah kesemua daging korban tersebut dengan sedikit diambil oleh pihak yang berkorban untuk mengambil keberkatan dari ibadah korban tersebut (al-Ghazzi, 1999).

Menurut Zulkiflie Bin Muhammad al-Bakri (2016) Mufti Wilayah Persekutuan di dalam Irsyad Fatwa Haji dan Korban Siri 4 berhubung dengan hukum memberi daging korban kepada *non-muslim* “Sekiranya di dalam komuniti masyarakat Islam di sesuatu tempat terdapat jiran-jiran mereka yang bukan Islam dan mereka itu dikenali dengan sifat baik serta ramahnya dengan masyarakat setempat, jika terdapat lebihan dari hasil korban maka dibolehkan untuk diberikan kepada mereka. Namun jika hasil korban itu hanya mencukupi untuk orang Islam, maka dahulukanlah umat Islam setempat yang lebih memerlukan”. Pandangan yang dikemukakan oleh Mufti Wilayah Persekutuan adalah dengan mengambil kira masalah dan juga siasah syariyyah bagi menjaga keharmonian masyarakat majmuk di dalam uruf masyarakat di Malaysia.

Begitu juga sebagaimana yang dikemukakan oleh JAKIM di dalam e-fatwa (t.t) berkenaan tentang keharusan untuk memberi daging korban sunat kepada *non-muslim* tetapi keutamaan pemberian tersebut hendaklah diberikan kepada orang Islam. Ini menunjukkan bahawa keperluan terhadap pembahagian daging korban adalah dengan mengutamakan orang Islam terutama bagi golongan yang tidak berkemampuan.

2.5 Mempunyai Hubungan Kekeluargaan, Kejiranan Dan Lain-Lain

Amalan sedekah yang dianjurkan dalam Islam adalah bertujuan bagi melengkapkan kitaran hidup manusia. Orang yang kaya membantu yang miskin serta yang kuat membantu golongan yang lemah. Ini merupakan tanggungjawab bagi setiap muslim yang diberikan oleh Allah SWT dengan kelebihan nikmat dan harta yang banyak. Islam mengajar kita supaya mengutamakan sesuatu mengikut susunan urutan dan keutamaannya. Begitu dalam soal memberi sedekah. Firman Allah SWT:

Memberikan harta yang dicintainya kepada kerabatnya (al-Quran, al-Baqarah 2:177).

Rasulullah SAW juga menjelaskan agar melihat keperluan bersedekah kepada golongan yang ingin dibantu. Baginda SAW bersabda yang bermaksud: "Sedekah kepada orang miskin terhitung

pahala satu sedekah. Sedekah kepada kaum kerabat mendapatkan dua pahala (iaitu) pahala sedekah dan pahala menyambung silaturahim." (Hadis riwayat Tirmidzi No.658)

Menurut Syeikh ⁶Abdullah al-Faqih (2016) di dalam komentarnya berhubungan dengan pemberian daging korban kepada golongan *non-muslim*, beliau menyatakan bahawa tidak menjadi masalah untuk memberi daging korban kepada orang kafir yang mempunyai hubungan kekeluargaan dan juga hubungan kejiranan. Pandangan yang dikemukakan oleh beliau adalah berdasarkan kepada hadis yang diriwayatkan oleh Asmaa' Bt Abū Bakar Al-Siddiq R.A: "Anda kekalkan hubungan yang baik dengan ibu anda", telah maklum bahawa ibu Asmaa' adalah seorang kafir Quraish yang tidak beriman."Hadis ini menunjukkan kepada kita bahawa keutamaan memberi sedekah kepada seseorang yang mempunyai hubungan pertalian dan hubungan kejiranan lebih diutamakan walaupun mereka masih dalam keadaan kafir.

Al-Qardhawi (1999) juga turut menegaskan hal perkara yang sama berhubung dengan tidak menjadi suatu kesalahan dan dibolehkan bagi orang Islam memberi makan dari daging korban kepada *non-muslim* lebih-lebih lagi jika mereka mempunyai hubungan persaudaraan.

Manakala Shawky ⁶Allam (2011) di dalam fatwa yang diterbitkan oleh *Dar al-Ifta' Misriyyah* menyatakan bahawa tidak mengapa memberi daging korban kepada *non-muslim* dengan sebab mempunyai hubungan kekeluargaan atau kejiranan kerana ini bertujuan untuk menjinakkan mereka dengan Islam.

3.0 PANDANGAN FUQAH MAZHAB SYAFIE YANG MENGATAKAN HARAM MEMBERI DAGING KORBAN KEPADA *NON-MUSLIM*.

Hujah Imam Syafie terhadap hukum pengharaman pemberian daging korban kepada *non-muslim* adalah kerana ibadah korban itu sendiri merupakan suatu ibadat yang dikhususkan kepada orang Islam semata-mata. Ini juga kerana bagi mereka yang melakukan ibadat berkenaan, mereka dianggap sebagai tetamu Allah SWT. Matlamat dari pelaksanaan ibadat berkenaan adalah untuk menzahirkan tanda takwa bagi orang yang melakukan ibadat tersebut di samping mendapat pahala sedekah di atas pemberian daging tersebut kepada golongan miskin. Di samping itu, ibadat korban yang dilakukan ini dapat melatih diri kita supaya sentiasa ikhlas dalam melakukan ibadat dan juga sentiasa bersedia untuk berkorban demi agama. Ini sebagaimana yang dinyatakan oleh Allah SWT:

Daging dan darah binatang korban atau hadiah itu tidak sekali-kali akan sampai kepada Allah, tetapi yang sampai kepadaNya ialah amal yang ikhlas yang berdasarkan takwa dari kamu (al-Quran, al-Hajj 22:37).

Bagi pandangan yang menyatakan haram memberi daging korban kepada *non-muslim* ia tertakluk kepada perkara-perkara berikut:

3.1 KORBAN WAJIB DAN SUNAT TIDAK BOLEH

Para ulama berbeza pandangan mengenai hukum melakukan ibadah korban sama ada ia wajib atau pun sunat. Majoriti ulama termasuk syafie, maliki dan hambali mengatakan bahawa melakukan korban pada Hari Raya Aidiladha termasuk dalam hukum sunat muakkad (Ibrahim Baijūri 2010). Manakala Imam Abu Hanifah termasuk al-Auzai dan Abu Laits berpandangan bahawa melakukan korban pada Hari Raya Aidiladha adalah wajib bagi mereka yang berkemampuan dan juga wajib sekali seumur hidup (Wahbah al-Zūhaili, 1989).

Berhubung dengan hukum pengharaman pembahagian daging korban kepada *non-muslim*, fuqaha mazhab syafie berbeza pandangan kerana ada yang berpandangan diharamkan pemberian tersebut hanya dikhususkan untuk korban wajib semata-mata dan ada pula yang berpandangan bahawa pengharaman tersebut adalah bagi kedua-duanya sekali, iaitu korban wajib dan sunat. Menurut Ibnu Hajar al-Haitami (1983) di dalam kitabnya yang berjudul *Tuhfatu al-Muhtaj Fi Syarhi al-Manahij* Ibn Hajar menyatakan bahawa tidak harus bagi golongan kafir zimmi serta harbi diberi atau diagihkan daging korban sama ada wajib atau sunat kepada mereka. Begitu juga dengan mereka yang telah terkeluar dari Islam. Ini kerana korban itu merupakan suatu ibadah dan ianya hanya dikhususkan kepada orang Islam semata-mata.

Pandangan ini juga turut disokong oleh al-Ramli (2003) di dalam kitab yang berjudul *Nibayah al-Muhtaj Ila Syarh al-Manahij* beliau menyebut tentang haram hukum memberi daging korban kepada *non-muslim* secara mutlak. Pengharaman ini merangkumi korban sunat dan juga bagi korban wajib. Beliau menyatakan bahawa tujuan pemberian daging korban adalah bertujuan mewujudkan perasaan kasih sayang terhadap orang Islam kerana mereka adalah tetamu Allah. Mana mungkin perasaan ini wujud kepada orang kafir.

Manakala menurut Khatib al-Syarbini (1997) menyatakan bahawa tidak harus diberikan daging korban kepada bukan Islam. Pandangan ini dinukilkan di dalam kitabnya iaitu *Mughni al-Muhtaj Ila Makrifati Ma'ani Alfaz*. Menurut beliau, daging korban hanya boleh diberikan kepada orang Islam sebagaimana yang dinyatakan oleh al-Buwaiti dan pengharaman tersebut merangkumi korban wajib dan juga sunat.

Menurut Abū Qasim al-Ghazzi di dalam *Hasyiah al-Syeikh Ibrahim al-Bajjuri* mengatakan bahawa tidak harus memberi daging korban selain dari kalangan orang Islam sebagaimana yang dinyatakan oleh al-Buwaiti. Beliau menukilkan lagi bahawa tidak ada sedekah atau hadiah secara mutlak ke atas mereka walaupun dari korban sunat. Pandangan yang sama juga turut dikongsi oleh ‘Abdullah Bin Hasan al-Hasan al-Kahaji di dalam kitab *Zad al-Muhtaj Bi Syarhi al-Manahij*. Beliau turut bersependapat bahawa hukumnya haram sekiranya memberi daging korban kepada golongan selain dari orang Islam.

Pandangan sama turut disuarakan oleh Mohamad Shukri Bin Mohamad Mufti Kelantan (2016) yang menyatakan bahawa haram bagi umat Islam memberi daging korban kepada *non-muslim* sama ada korban wajib atau korban sunat. Walau bagaimanapun beliau menyatakan bahawa dalam keadaan tertentu (mengikut keadaan dan suasana) ia dibolehkan dengan alasan bagi menjinakkan hati mereka kepada Islam. Beliau berpandangan bahawa daging korban merupakan suatu ibadah yang diibaratkan seperti jamuan dari Allah SWT kepada ahlu ibadah. Suatu analogi yang diberikan oleh beliau adalah pemberian zakat kepada Orang Asal yang memeluk agama Islam yang berada di kawasan pendalaman. Bukan kesemua dari mereka menganut agama Islam. Pemberian zakat yang hanya kepada golongan Islam akan menyebabkan mereka yang bukan Islam akan menjauhkan diri mereka dengan Islam.

Kenyataan ini disokong oleh Zamri Bin Hashim (2016) yang merupakan Timbalan Mufti Perak. Beliau berpandangan sama bahawa daging korban hanya untuk orang Islam sama ia wajib ataupun sunat. Keperluan umat Islam terhadap daging korban masih tinggi. Beliau menyatakan bahawa dalam suasana dan keadaan sekarang, masih ramai umat Islam yang tidak dapat menikmati daging korban. Contohnya di kawasan kampung-kampung dan juga di kawasan pendalaman. Perkara ini tidak berlaku di kawasan-kawasan bandar yang mana setiap kali ibadah korban dilakukan, daging korban berlebih-lebihan sehinggakan seolah-olah semua orang miskin telah dapat menikmati daging tersebut. Beliau turut memberi pandangan bahawa sekiranya orang

yang berkorban berhajat untuk menjemput saudara mara yang bukan Islam atau jiran *non-muslim* atau rakan sekerja yang *non-muslim*, maka mereka boleh disediakan dengan meja khas dan hidangan daging yang berasingan supaya dapat turut sama meraikan golongan *non-muslim*.

Demikian menurut beberapa pandangan yang menyatakan bahawa daging korban haram diberikan kepada bukan Islam, sama ada korban sunat atau korban wajib. Umum dari pandangan para fuqaha bersepakat bahawa pengharaman tersebut adalah disebabkan korban itu merupakan suatu ibadat yang dilakukan bagi tujuan *taqarrub* kepada Allah SWT. Jadi tidak timbul soal sama ada korban itu wajib atau sunat kerana kedua-duanya dilakukan untuk Allah SWT.

3.2 HANYA KEPADA KORBAN WAJIB SAHAJA

Terdapat juga beberapa pandangan fuqaha Mazhab Syafie yang menyatakan bahawa pengharaman hukum pembahagian daging korban tersebut hanya kepada korban wajib semata-mata, manakala bagi korban sunat maka ia diperbolehkan. Ini sebagaimana yang dinukilkan oleh al-Buhūti (1983) di dalam kitabnya *Kasyfu al-Qina' An Matan al-Iqna'* yang memberi maksud bahawa haram memberi daging korban kepada bukan Islam sekiranya korban itu adalah korban wajib. Beliau menqiyaskan korban wajib sama seperti zakat dan kafarah yang mana kedua-duanya tidak boleh diberikan kepada *non-muslim*.

Begitu juga dengan pandangan yang dinyatakan oleh Al-Nawawi (t.t) di dalam kitab yang berjudul *al-Majmuk Syarh al-Mubazzab li al-Syairazi*. Walaupun beliau mengharuskan pemberian daging korban kepada *non-muslim* tetapi ia dibataskan hanya untuk korban sunat. Bagi korban wajib ia tetap tidak boleh diberikan kepada *non-muslim* walaupun ia merupakan kafir *zimmi* atau kafir *mustakmin*.

Pandangan ini turut dipertegaskan oleh Muhammad al-Zuhaili (2011) di dalam kitabnya yang berjudul *al-Muktamad Fi al-Fiqhi al-Syafie*. Beliau menyatakan bahawa keharusan memberi daging korban diutamakan kepada fakir miskin dalam kalangan orang Islam. Namun, tidak menjadi suatu kesalahan sekiranya memberi daging tersebut kepada golongan *non-muslim* selagi mana mereka patuh dan taat kepada pemerintah Islam. Keharusan tersebut hanyalah untuk daging korban sunat sahaja tidak kepada daging korban wajib. Menurut beliau lagi, daging korban wajib seperti nazar hanya untuk orang Islam sahaja dan ia tetap haram sekiranya diberikan kepada golongan *non-muslim*.

Malahan Jabatan Kemajuan Islam Malaysia sendiri menyatakan bahawa harus memberi daging korban kepada *non-muslim* tetapi perlu mendahulukan orang Islam. Korban tersebut khusus untuk korban sunat semata-mata, bagi korban wajib JAKIM juga tidak bersetuju jika ia diberikan kepada *non-muslim*.

3.3 WAJIB DIGANTI

Menurut beberapa pandangan fuqaha, daging korban yang diberikan kepada *non-muslim* harus diganti. Pandangan ini sebagaimana yang dinukilkan di dalam *Hasyiah al-Shabramallisi* yang ditulis oleh 'Ali al-Shabramallisi. Beliau menyatakan bahawa sekiranya daging korban sunat atau wajib diberikan kepada mana-mana kafir maka ia harus digantikan dengan daging korban yang lain.

Begitu juga sebagaimana yang diterangkan oleh Muhammad Bin Ismail Daud Fatani (1984) di dalam kitab *Matla' al-Badrain Wa Majmak al-Bahrain* sekiranya ada bahagian dari korban diberi atau dijual kepada *non-muslim*, maka ia wajib diganti sekadar menyamai pemberian tersebut atau yang dijual tersebut. Perkara tersebut juga turut dinukilkan oleh Muhammad Arsyad Bin

Abdullah al-Banjari (t.t) di dalam kitab *sabil al-Muhtadin*. Mohamad Shukri Bin Mohamad (2016) turut memberi jawapan yang sama, iaitu wajib bagi mereka yang telah memberi daging korban kepada *non-muslim* untuk menggantikan daging yang lain sekadar menyamai nilai daging yang telah diberikan kepada golongan tersebut.

4.0 KESIMPULAN

Berdasarkan kepada perbincangan dan perbahasan di atas, penulis berpandangan bahawa pendapat yang rajih dan terpilih adalah pandangan yang mengatakan harus memberi daging korban kepada *non-muslim* dalam konteks masyarakat majmuk dan silang agama di Malaysia. Keharusan ini dilihat dari sudut masalah dan juga dari sudut maqasid dakwah kepada golongan tersebut. Ini kerana sekiranya golongan tersebut dikenali dengan sifat baik, ramah serta mereka berpotensi untuk Islam dalam masa yang sama hasil korban tersebut telah dinikmati oleh orang Islam, maka dibolehkan memberi daging korban tersebut kepada golongan *non-muslim*. Manakala bagi daging korban yang dimasak atau bertujuan untuk dijamu kepada hadirin, penulis berpandangan bahawa dibolehkan menjemput jiran atau rakan sekerja atau saudara mara yang berlainan agama untuk menikmati jamuan tersebut. Ini kerana uruf dalam masyarakat kita, apabila mengadakan kenduri mereka menyediakan menu yang terdiri dari pelbagai lauk-pauk dan bukan hanya bergantung kepada daging korban semata-mata. Dalam masa yang sama perlu dingatkan supaya kenduri yang dilakukan tersebut tidak meminggirkan orang-orang Islam yang miskin khususnya jiran yang terdekat.

Rujukan

- Abdul Karim Ali. (2007). *Tajdid Fiqh Mazhab Syafie Di Malaysia*. Kuala Lumpur: Akademik Pengajian Islam Universiti Malaya.
- Abdul Karim, Zaidan. (1987). *Al-Wajiz Fi Usul Fiqh*. Beirut: Muassasah al-Risalah.
- Abdul Wahhab Ibrahim Abū Sulaiman. (1999). *Manhajyyah al-Imam Muhammad Bin Idris al-Syafie*. Beirut: Dar Ibnu Hazm.
- Abū Zuhrah, Muhammad. (1996). *al-Syafie Hayatibi Wa Asribi, Araabu Wa Fiqhibi*. Qaherah: Dar Fikr al-‘Arabi al-‘Ilmiyyah.
- Al-Amidi, ‘Ali bin Muhammad. (1998). *al-Abkam Fi Usul al-Abkam*. Beirut: Dar Kitab al-‘Arabi.
- Al-Badawi, Yūsof Ahmad Muhammad. (1999). *Maqasid al-Syariab ‘Inda Ibn Taimiyyah*. Jordan: Dar al-Nafais.
- Al-Barzanji, ‘Abdul Latif ‘Abdullah ‘Aziz. (1993). *al-Ta‘arud Wa al-Tarjih Baina al-Adillah al-Syariyyah*. Jil.2. Beirut: Dar al-Kutub al-Ilmiyyah.
- Al-Buhūti, Mansūr Bin Yūnus Bin Idris. (1983). *Kasyfu al-Qina' ‘An Matan al-Iqna'*. Beirut: ‘Aalam al-Kutub.
- Al-Diqr, ‘Abdul al-Ghani. (1985). *al-Imam al-Syafie Faqih al-Sunnah al-Akbar*. Beirut: Dar al-Fikr.
- Al-Ghazali, Muhammad. (1983). *al-Mustasfa Min ‘Ilmi al-Usul*. Beirut: Dar al-Kutub al-‘Ilmiyyah.
- Al-Ghazzi, Abu Qasim. (1999). *Hasyiah al-Syeikh Ibrahim al-Baijuri*. Beirut: Dar al-Kutub.
- Al-Jurjani, ‘Ali Bin Muhammad al-Sayyid al-Syarif. (1988). *Kitab al-Takrifat*. Beirut: Dar al-Kutub al-‘Ilmiyyah.

- Al-Juwayni, Abdul Malik. (1997). *al-Burhan Fi Usul al-Fiqh*. Beirut: Dar al-Kutub
- Al-Nawawi, Abu Zakaria Mahyuddin Syaraf. (t.th). *al-Majmuk Syarb al-Muhazẓab li al-Syairazi*. Arab Saudi: Maktabah al-Irsyad.
- Al-Qaradawi, Yusuf. (1994). *al-Ijtihad al-Mu'asir Bayn al-Indibat Wa al-Infira*. Kaherah: Dar al-Tiba'ah Wa al-Nasyr al-Islamiyyah.
- Al-Qardhawi. (1999). *Al-Jāliāt al-Islāmiyyah Fī Bilād al-Gharab*.
<http://www.aljazeera.net/programs/religionandlife/2004/6/3/-الجاليات-الإسلامية-في-بلاد-الغرب-2> di akses pada 3 Ogos 2016.
- Al-Qawasimi, Akram Yusof Umar. (2003). *al-Madkhal Ila Mazhab al-Imam al-Syafie*. Jordan: Dar al-Nafais.
- Al-Ramli, Syamsuddin Muhammad Bin Abu 'Abbas Ahmad Bin Hamzah Bin Syihabuddin. (2003). *Nibayah al-Muhtaj Ila Syarb al-Manahij*. Beirut: Dar al-Kitab al-Ilmiyyah.
- Al-Subki, 'Aliy Bin 'Abd al-Kafi. (1982). *al-Ibhaj Fi Sharh al-Minhaj*. Beirut: Dār al-Kutub al-Ilmiyyah.
- al-Syarbini, Syamsuddin Muhammad B. Al-Khatib. (1997). *Mughni al-Muhtaj Ila Makrifati Maani Alfaz*. Beirut: Dar al-Makrifah.
- Al-Syatibi, Abu Ishak Ibrahim B. Musa. (2009). *Tabzib al-Muwafaqat*. Saudi: Dar Ibn al-Jauzi.
- Al-Zarkashi, Badr al-Din Muhammad Bin Bahar Bin 'Abdullah. (2000). *al-Babr al-Muht Fi Usul al-Fiqh*. Beirut: Dār al-Kutub al-Ilmiyyah.
- Al-Zarqa', Ahmad B. Muhammad. (1983). *Madkhal al-Fiqh al-Am*. Damsyik: Dar Qalam.
- Al-Zuhaili, Muhammad. (2011). *al-Muktamad Fi al-Fiqhi al-Syafie*. Damsyik: Dar Qalam.
- al-Zūhaylī, Wahbah. (1989). *al-Fiqh al-Islāmi Wā Adillatub*. Ed. 3. Jil. 3. Damsyik: Dar al-Fikr.
- Atikullah Abdullah. (2010). *Konsep Dan Ciri-Ciri Fiqh Lestari: Ke Arab Mengarusperdanakan Fiqh Dalam Kehidupan Masyarakat*. Jurnal Syariah, Jil. 18, Bil. 3. Kuala Lumpur: APIUM.
- 'Abdullah al-Faqih. (t.t). *I'ta al-Kāfirī Min al-Udhbiyyah*. Diakses di:
<http://www.alifta.com/Fatawa/FatawaSubjects.aspx?languagename=ar&View=Page&HajjEntryID=0&HajjEntryName=&RamadanEntryID=0&RamadanEntryName=&NodeID=1979&PageID=4214&SectionID=3&SubjectPageTitlesID=25646&MarkIndex=1&0#%d8%a5%d8%b9%d8%b7%d8%a7%d8%a1%d8%a7%d9%84%d9%83%d8%a7%d9%81%d8%b1%d9%85%d9%86%d8%a7%d9%84%d8%a3%d8%b6%d8%ad%d9%8a%d8%a9> [3 Ogos 2016].
- 'Ali Ahmad, al-Nadawi. (1986). *Al-Qawā'id al-Fiqhiyyah*. Damsyik: Dar al-Qalam.
- 'Ali al-Shabramallisi, Abu al-Dhia Nuruddin 'Ali. (t.t). *Hasyiah al-Shabramallisi*. Dlm: *Nibayah al-Muhtaj Ila Syarb al-Manahij*. Beirut: Dar al-Kitab al-Ilmiyyah.
- 'Ali Jumū'ah, Muhammad. (2004). *al-Madkhal ila Dirasah al-Madhabib al-Fiqhiyyah*. al-Qahirah: Dar al-Salam.
- Fakhruddin al-Razi, Abū 'Abdullah Muhammad Bin 'Umar Bin al-Husain. (1999). *al-Mabsūl Fi 'Ilmi al-Usul*. Beirut: Dar al-Kutub al-Ilmiyyah.
- <http://www.al-ahkam.net/home/content/e-fatwagovmy-boleh-agih-korban-kepada-non-muslim> [27 November 2016].
- <http://www.dar-alifta.org/ar/ViewFatwa.aspx?sec=fatwa&ID=13021> [1 Oktober 2016].
- http://www.islamweb.net/php/php_arabic/ [27 November 2016].
- <https://islamqa.info/ar/180503> [1 Oktober 2016].
- Ibn Qudamah, Syamsuddin Abū al-Faraj 'Abdul Rahman Bin 'Abu 'Umar Muhammad Bin Ahmad. (t.th). *Al-Mughni Syarab al-Kabir*. 'Arab Saudi: Dar al-Kitab al-'Arabi.

- Ibnu 'Abd. Al-Salam, Abu Muhammad 'Izzuddin Bin 'Abd. 'Aziz. (1997). *Al-Qawā'id al-Sughra*. Saudi: Dar Furqan.
- Ibnu Hajar al-Haitami, Ahmad Bin Muhammad Bin 'Ali. (1983). *Tubfatu al-Mubtaj Fi Syarbi al-Manabij Ibn Hajar*. Beirut: Dar Ihya' al-Turath al-'Arabi.
- Ibrahim Baijuri. (2010). *Hasyiah al-Syeikh Ibrahim Al-Bayjuri*. Jil.4. Kaherah, Mesir: Maktabah al-Syurq al-Dawliyyah.
- Jabatan Kemajuan Islam Malaysia. (t.t). Hukum Daging Korban Berkaitan Dengan Orang Bukan Islam. <http://www.al-ahkam.net/home/content/e-fatwagovmy-boleh-agih-korban-kepada-non-muslim> [3Ogos 2016].
- Jabatan Mufti Negeri Melaka. (2015). Persoalan Dan Pelaksanaan Ibadah Korban. *Melaka Hari Ini*. 18 September 2015: 10-11. <http://mhi.com.my/paper/2015/September/180915/180915.pdf> [3 Ogos 2016].
- Jainal Sakiban al-Jauhari. (2009). *Persoalan Mazhab: Kenapa Perlu Mengikut Mazhab*. Johor Bharu: Majlis Agama Islam Negeri Johor.
- Jalaluddin Rakhmat. (2007). *Dabulukan Akhlak di Atas Fiqh*. Bandung: PT. Mizan.
- Mohamad Shukri Bin Mohamad. (2016). *Penentuan Hukum Terhadap Pembagian Daging Korban Menurut Mazhab Syafie*. Temubual. 20 Disember 2016.
- Muhammad Abu Zuhrah. (t.t). *Tarikh al-Madhabib al-Islamiyyah*. Kaherah: Dar al-Fikr.
- Muhammad Bin Ismail Daud Fatani. (1984). *Matla' al-Badrain Wa Majmak al-Bahrain*. Pattani: Matbaah Bin Halabi.
- Muhammad Ismail Abdullah & Abdul Karim Ali. (2014). *Teori Dan Amalan Tarjih Imam al-Syafie*. Kuala Lumpur: Akademik Pengajian Islam Universiti Malaya.
- Munib B. Mahmud Syakir. (1998). *al-'Amal Bi al-Ihtiyati Fi al-Fiqh al-Islami*. Riyadh: Dar al-Nafais.
- Raisyūni, Ahmad. (2010). *Madkhal Ilā Maqasid al-Syari'ah*. Kaherah: Dar al-Kalimah.
- Saadan Man, Abdul Karim Ali, Luqman Abdullah, Rushdi Ramli & Inarah Ahmad Farid. (2009). Kesesuaian Pemikiran Dan Amalan Mazhab Selain Syafi'I Dalam Masyarakat Islam Di Malaysia: Suatu Analisis Awal. *Jurnal Fiqh No.6 (6)*: 21-40.
- Shawky 'Allam. 2011. *Hal Yajuz I'ta Ghair Muslim Min al-Udhiyyah?*. <http://www.dar-alifita.org/ar/ViewFatwa.aspx?sec=fatwa&ID=13021> [1 Ogos 2016].
- Soleh al-Munjid. 2012. *Hal Yajuz I'ta Labmu al-Udhiyyah Lil Jirani Min Ghair al-Muslim*. <https://islamqa.info/ar/180503> [1 Ogos 2016].
- Wan Salim Bin Wan Mohd Noor. (2017). *Penentuan Hukum Terhadap Pembagian Daging Korban Menurut Mazhab Syafie*. Temubual. 19 Januari 2017.
- Zamri Bin Hashim. (2016). *Penentuan Hukum Terhadap Pembagian Daging Korban Menurut Mazhab Syafie*. Temubual. 19 Disember 2016.
- Zulkifli al-Bakri. (2016). *Irsyad al-Fatwa Khas Haji & Korban Siri 4: Hukum Memberi Makan Daging Korban Kepada Non Muslim*. <http://muftiwp.gov.my/ms/artikel/irsyad-fatwa/edisi-haji-korban/1071-irsyad-al-fatwa-khas-haji-korban-siri-4-hukum-memberi-makan-daging-korban-kepada-non-muslim> [3 Oktober 2016].